

Uns Stroß

Et Schöns, wat jemols ich jekannt,
An Stroße, Jasse, Wäje,
Dat es för mich uns Hauptstroß he,
En Dellbröcks Hätz jeläje.

Ne Fremde denk sich secher jitz:
Dä üvverspannte Stivvel.
Trotzdäm, wann ich se jon elans,
Dann freut mich jede Jivvel.

Wä he jebore, süht se noch
Su wie en Kinderdage
Un trort dä ahle Hüsjer noh,
Die lang allt avjedrage.

Doch och an mänchem, wat noch steit,
Deit hä e beßje döse
Un weed dann, wie en ahler Zick,
Vertraut noh bovve jröße.

Se lijjen en de Finster all,
Die lang nit mih he wiede:
Die ahl Frau Schmitz, der Kestls Schäng,
Der Pflüger, Flemm, der Thiele.

Paar Name sprechen för se all,
Die he ens jlöcklich wore;
En joder wie en schlächter Zick,
Verbunge un verschwore.

Zoletz süht hä sich selver dann
Als Stoßjung he spille,
Met Schladerbotz un wunde Kneen,
De Schnüß schwatz vun Pastille.

Ming Sehnsuch wor e Stüffje he;
No es et mer jelunge.
Ich wonne widder medden dren:
Mi Hätz hät heimjefunge!

Gustav Wodarczyk (1931-1985)